

2018-miit ukiuni marluogallartuni misiliilluni unnukkut ammasartussamik (nal. 16-24) nuna tamakkerlugu call-centerimik, Nuna tamakkerlugu Ilitsersuisarfik (NTI-p) ataani pilersitsinissamat Naalackersuisut peqquneqarnissaannik Inatsisartut aalajangiiffigisassaattut siunnersuut. Call-Centeri sukkasuumik kinaassutsimillu isertuussilluni ilinniartunut, ilinniarnikkut, aningaasatigut inuttulluunniit ajornartorsiuteqartunut ikorfartuissaaq siunnersuisarlunilu. Call-centerip aamma taamatut siunnersuisarsinnaassaaq ilinniartut ilaqutaannut.

(Inatsisartunut ilaasortaq Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoq)

Siullermeerinnineq

Naalackersuisut siunnersuummut qujapput, tassa 2018-imi call-centerimik unnukkut ammasartussamik peqalernissaaq ukiut marluk misiliummik ingerlasussamik, Nuna Tamakkerlugu Ilitsersuisarfiup (NTI) ataaniittussamik, tassani ilinniartunut ilinniarnernerup tungaatigut, aningaasatigut imaluunniit inuttut atukkatigut unamminartumik atugaqartunut piaartumik nalunaarsorneqanngitsumillu tapersiillunilu siunnersuisoqartassaaq, ilinniartut ilaqutaannut aamma.

Siunnersuusiortup ukua pingasut pingaartutut erseqqissarpai:

1. Maannakkut pisarnek malillugu suleriaatsip pisariaqartitsisunik siunnersuinissaaq killeqartippaa.
2. Nalunaarsorneqanngitsumik siunnersuinissamik neqeroorummik pitsaanerusumik piumasoqarpoq.
3. Call-Centeri aqqutigalugu nalunaarsorneqanngitsumik siunnersuisarnerup ilinniakkaminnik taamaatitsiinnartartut ikilisissinnaagunarpai.

Naalackersuisut isumaqatigaat NTI ilinniakkamik unitsitsiinnartarnerup annikillisinniarnerneranut assut pingaaruteqartoq. Kisiannili nalunaarsorneqanngitsumik siunnersuisarnek neqeroorutaareerpoq Ilinniartut Siunnersuisarfiatigut soorlu mailikkut aamma oqarasuaatikku. Tassanilu aamma massakkut web aqqutigalugu Skype-kkut siunnersuisinnaaneq periarfissatut misissorneqarpoq. Ilinniartunut Siunnersuisarfiup maannakkut nal. 7-17 oqaloqateqarsinnaaneq neqeroorutitut ingerlappaa. Ajorluartumilli Siunnersuisarfiup misilittagai naapertorlugit ilinniartut ulloq naallugu atuareernerup kingorna oqaloqateqarnissaaq nukissaqarfigineq ajortarsimavaat.

Ilinniartunut Siunnersuisarfirmi qangali utaqqisorpassuaqarsimavoq, ingasammik Nuummi, utaqqisut amerlassusii nikingaassanatik 30-t missaanniillutik. Februarimi Ilinniartunut Siunnersuisarfiup kiisami atorfiit akuersissutaasut tamaasa inuttassarsisimavai. Aatsaallu massakkut tarnip pissusaanik ilisimatuumik oqaloqateqarnermik neqeroorut

ingerlanneqarsinnaanngorsimavoq Nuup avataani aammalu qarasaasiaq atorlugu toqqaannartumik, taamaalilluni utaqqisut ikilisarniarlugit. Massakkut web atorlugu neqeroorutaasinnaasunik allanik periarfissat suut ineriartortinneqarsinnaanerat misissorneqarput, eqimattakkaarlunilu oqaloqateqarneq imminullu ikiornissamut ikiuutit pillugit aamma suliniutinik aallartittoqarpoq.

Maluginiarneqassaaq Ilinniartunut Siunnersuisarfik pisortaniit suliffiutaammat, taamaammallu sullissinermi inatsisip ataaniilluni. Tamanna isumaqarpoq nalunaarsorneqanngitsumik oqaloqateqarnerit marluk kisimik pisinnaasut. Taakku sinneraanni suliamik aallartitsisoqassaaq nalunaarsuinerlu aallartinneqarluni. Aamma maluginiagassaavoq ulloq unnuarlu neqeroorutaanngimmat. Tamannalu pissutigalugu ammanerisa avataatigut pinartumik pisoqarpat ikiuisoqarsinnaanani. NTI-p ernumassutigalugu oqaatiginikuuaa, atorfiit suliffiup nalinginnaasup iluani akuersissutigineqartut aatsaat ukiut pingasut qaangiunnerini tamaasa inuttassarsineqarmata, , taava call-centerimut sulisussarsiorneq suli ajornakusoornerussaaq ammasarfiisa equnganerunerat pissutigalugu. Aammami siunertaqaqatigiit allat ullumikkut nalunaarsorneqanngitsumik siunnersuisarneq ingerlappaat call-center atorlugu, ilaallunilu ilaqutariinnut nalunaarsorneqanngitsumik siunnersuisarfik.

Qulaani pineqartut tunuliaqutigalugit Naalakkersuisut siunnersuummut isumaqataasinnaanngillat, siunnersuutillu itigartinneqarnissaa innersuussutigineqarpoq.